

**01/10.1/6721-09**

**2009-10-13**

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԱԶԳԱՅԻՆ ԺՈՂՈՎԻ ՆԱԽԱԳԱՀ

պարոն ՀՈՎԻԿ  
ԱԲՐԱՀԱՄՅԱՆԻՆ

Հարգելի պարոն Աբրահամյան

Հայաստանի Հանրապետության կառավարությունը Հայաստանի Հանրապետության Ազգային ժողովի պատգամավորներ Գալուստ Սահակյանի, Ռաֆիկ Պետրոսյանի, Վարդան Բոստանջյանի, Արամ Սաֆարյանի և Լարիսա Ալավերդյանի՝ օրենսդրական նախաձեռնության կարգով ներկայացրած «Հայաստանի Հանրապետության քրեական դատավարության օրենսգրքում փոփոխություն կատարելու մասին» Հայաստանի Հանրապետության օրենքի նախագծի վերաբերյալ սկզբունքային առարկություններ չունի:

Հարգանքով՝

ՏԻԳՐԱՆ ՍԱՐԳՍՅԱՆ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՕՐԵՆՔԸ

Հայաստանի Հանրապետության քրեական դատավարության օրենսգրքում փոփոխություն  
կատարելու մասին

**Հոդված 1.** Հայաստանի Հանրապետության 1998 թվականի հուլիսի 1-ի քրեական դատավարության օրենսգրքի 414.1 հոդվածի 2.1-րդ մասը շարադրել հետևյալ բովանդակությամբ.

«2.1. Սույն օրենսգրքի 414<sup>2</sup> հոդվածի առաջին մասում նախատեսված հիմքերի բացակայության հիմնավորմամբ վճռաբեկ բողոքը վերադարձնելու մասին վճռաբեկ դատարանի որոշումը պետք է լինի պատճառաբանված:»:

**Հոդված 2.** Սույն օրենքն ուժի մեջ է մտնում պաշտոնական հրապարակմանը հաջորդող տասներորդ օրը:

ՀԻՄՆԱՎՈՐՈՒՄ

«Հայաստանի Հանրապետության քրեական դատավարության օրենսգրքում փոփոխություն կատարելու մասին» օրինագիծը մշակվել է ՀՀ սահմանադրական դատարանի 2009թ. հուլիսի 28-ի ՄԴՈ-818 որոշմանը համապատասխան: Այդ որոշմամբ դատարանը ՀՀ Սահմանադրության 18 եւ 19-րդ հոդվածների պահանջներին հակասող եւ անվավեր է ճանաչել քրեական դատավարության օրենսգրքի 414.1 հոդվածի 2.1-րդ մասը՝ օրենսգրքի 414.2 հոդվածի 1-ին մասի 1-ին կետով նախատեսված հիմքի բացակայության հիմնավորմամբ վճռաբեկ բողոքը պատճառաբանված որոշմամբ վերադարձնելու պահանջը բացառելու մասով, գտնելով, որ բողոքը վերադարձնելու մասին վճռաբեկ դատարանի որոշումը պետք է պատճառաբանվի ոչ միայն հոդվածի այդ մասում նշված երկու դեպքերում, այն է՝ երբ դատական ակտը առերեսույթ (ակնհայտորեն) հակասում է վճռաբեկ դատարանի՝ նախկինում ընդունված որոշումներին, կամ, վճռաբեկ դատարանի կողմից թույլ է տրված առերեսույթ դատական սխալ, որը կարող է առաջացնել կամ առաջացրել է ծանր հետեւանքներ, այլ նաեւ այն դեպքում, երբ վճռաբեկ դատարանի որոշումը կարող է էական նշանակություն ունենալ օրենքի միատեսակ կիրառության համար: Սահմանադրական դատարանը հենվել է 2007թ. ապրիլի 8-ի եւ ապրիլի 11-ի ՄԴՈ 690 եւ 691 որոշումների վրա, որոնց համաձայն պատճառաբանվածության պարտադիր պահանջը կապվում է վճռաբեկ բողոքի ընդունելիության եւ վճռաբեկ դատարանում գործը

քննելու բոլոր հիմքերի հետ: Դրա նպատակն է դատական ակտի նկատմամբ բողոք բերող անձի վստահության ապահովումը: Մանավանդ որ, սահմանադրական դատարանի **2008թ. նոյեմբերի 25-ի ՍԴՈ-765** որոշմանը համապատասխան ՀՀ **26.12.2008, ՀՕ-233** օրենքով ՀՀ քաղաքացիական դատավարության օրենսգրքի` նույն հարցը կարգավորող հոդվածը (**233** հոդվ. **2**-րդ մասը) փոփոխվել է, եւ վերացվել են վճռաբեկ բողոքն առանց պատճառաբանության վերադարձնելու բոլոր հիմքերը, հետեւաբար երկու օրենսգրքերում էլ (Քաղ. դատ. եւ Քր. դատ.) համարժեքային բովանդակություն ունեցող միեւնույն հարցը պետք է կարգավորվի միատեսակ ձևով: Սրանով կվերանա քննարկվող հարցում **2** օրենսգրքերի նորմերի միջեւ եղած հակասությունը, եւ կապահովվի մարդու իրավունքների ու ազատությունների դատական արդյունավետ պաշտպանությունը, դատարանի հայեցողական լիազորության իրավաչափ եւ օրինական իրականացումը, խախտված իրավունքների վերականգնումը (Սահմանադրության **18** եւ **19**-րդ հոդվածներ):